

四庫全書

史部

欽定四庫全書

平定準噶爾方略正編卷二十四

乾隆二十一年春正月庚午

傳

諭喀爾喀王公等

上諭軍機大臣曰自辦理準噶爾以來喀爾喀王公等朕或施恩加封或按律治罪皆視其功過斟酌至當初不因喀爾喀係舊日臣僕有意苛求亦未

嘗任其希圖僥倖非分加恩也喀爾喀部落素有怯懦退縮之心從前初議進兵曾經降旨訓勉冀其各自振作嗣喀爾喀王公等皆知仰承朕意平定伊犁時人皆奮勉効力是以將和托輝特郡王青滾雜卜等優叙晉封而額林沁多爾濟身為扎薩克親王叅贊軍務將軍班第特派伊監視阿睦爾撒納同行先經齊木庫爾密告逆賊叛跡已露而扎薩克林丕勒多爾濟等又復屢次言及理宜

相機擒治乃額林沁多爾濟並不速辦反以阿睦爾撒納係雙親王伊係單親王難以辦理為辭遂巡觀望以致阿逆乘間脫逃次日始帶兵追逐勢已無及試思此何等事而額林沁多爾濟有意貽誤致使逆賊免脫其心尚可問乎核其情罪萬無可逭朕是以即將伊治罪而桑寨多爾濟尚屬幼年一聞阿逆遠竄即能奮身追捕巴扎爾什第等勦殺包沁勇往可嘉朕皆加恩封賞策布登扎布

効力軍營克繼伊父勞績又將阿逆謀叛之意屢次密告將軍班第是以朕格外施恩由公爵封至貝勒以是鼓勵至額駙色布騰巴爾珠爾興和托輝特郡王青滾雜卜原係阿睦爾撒納同隊之人逆賊負恩背叛形迹顯然伊等豈無所知且朕曾經密諭色布騰巴爾珠爾令其小心防範乃全不經心反為逆賊所惑與班第等意見不和經朕降旨令色布騰巴爾珠爾來京並將青滾雜卜調辦

汗哈屯事務孰意色布騰巴爾珠爾到京並未在  
朕前奏及阿睦爾撒納一語在色布騰巴爾珠爾  
身為額駙位列藩王不但伊無附賊之理即青滾  
雜卜世受國恩亦斷不至與逆賊通謀朕原可以  
深信第色布騰巴爾珠爾年幼無知一至於此朕  
實不勝憤懣已降旨將伊王爵革退嚴加禁錮至  
青滾雜卜亦係御前行走之人非他人可比且去  
歲進兵甚屬奮勉其罪不過與逆賊共事之時稍

為附和耳朕念伊往日勤勞姑從寬免嗣後益當  
痛改前非勉力報効朕用人行政一秉至公信賞  
必罰功罪皆由人自取毫無畸重畸輕之見可告  
天下後世恐伊等不知妄生疑惑著將此通行曉  
諭喀爾喀王公等知之

辛未

定邊左副將軍哈達哈疏奏阿睦爾撒納奏摺  
哈達哈奏言十二月十七日從前遣往哈薩克

之侍衛順德訥帶同傳

旨曉諭阿睦爾撒納之厄魯特兆齊回至軍營稟稱  
阿睦爾撒納遣回伊等時有奏摺一件令交軍  
營大臣轉奏據阿睦爾撒納奏稱臣受

皇上天高地厚之恩諸事遵循

訓示仰賴

威福將達瓦齊及宰桑等擒獻

闕下又將準噶爾全部歸附



天朝第班第薩喇爾諸事暴急曾令額駙色布騰巴  
爾珠爾陳奏臣又向伊等商議四衛喇特人衆  
應遵

皇上諭旨收其離散憫其窮蹙一切如噶爾丹策零  
時令其安全今若辦理不善伊等性情剽悍必  
生變亂且恐哈薩克布魯特聞風附和班第等  
不能聽從至臣遵

旨入

覲行至烏隆古地方聞有擒拏之信不得已潛避所有  
頒給印信不敢棄置交與額林沁多爾濟帶回其班  
第薩喇爾如何陳奏之處自蒙

皇上洞鑒又班第薩喇爾乘馬直入喇嘛經堂將馬  
繫於柱上伊等並坐大喇嘛之上薩喇爾無忌  
妄談言四衛喇特人衆皆伊管理並於各鄂拓  
克內選擇婦女為妻復肆行擄掠宰桑克什木  
巴雅爾拉虎等衆皆切齒是以於臣未到伊犁

之前忽生變亂前奉到

皇上令遣使曉諭哈薩克之旨即派順德訥等及臣  
宰桑前往今阿布賚等共言與臣同盟結好斷  
不背約亦欲如臣一體沾

恩此順德訥所親聞者臣現擬將四衛喇特游牧整  
理並令同人布魯特塔什罕哈薩克等臣服

天朝將臣游牧與伊等會合同住斷不敢萌背叛之  
心接到

諭旨不勝感激悚惶伏祈

賞給臣管轄四衛喇特印信勉力報効等語奏入

上諭軍機大臣曰朕閱哈達哈等轉奏阿睦爾撒納所奏托忒字一摺顯係窮蹙無歸故為此搖尾乞憐之狀以圖僥倖於萬一然其叛逆之跡百喙難辭現在伊犁喇嘛宰桑等前往擒拏將軍策楞亦經進兵會勦自可計日就擒明正其罪以伸國法至伊摺內所奏班第薩喇爾各情節雖未可盡信

但阿睦爾撒納中途逃竄並未前抵伊犁而該處之喇嘛人等遂至倉皇生變則班第等之辦理不善亦可概見適與朕前降之旨相符將此宣示中外知之

授努三為三等侍衛同左都御史何國宗前往伊犁測量地理

定邊左副將軍哈達哈等疏奏遣使哈薩克及阿睦爾撒納現在情形

哈達哈等奏言據侍衛順德訥稟稱七月二十  
八日前往哈薩克阿布賚所住額卜圖淖爾地  
方宣示

勅諭阿布賚不勝懼怖告稱今準噶爾全部俱歸附  
天朝蒙

皇上不棄荒裔遣使曉諭實出望外今遣托克錫里  
鄂圖里達瑚等三人齎捧奏章同往入

覲並遣我弟岳勒博羅斯帶領屬人通使軍營大臣

又我尚有進

獻馬匹恐路遠易致疲瘦當緩期送赴阿睦爾撒納  
處轉為呈

獻等語並於八月二十五日至阿布賚之弟汗巴巴  
處宣示

勅諭訖至十月十六日至博羅塔拉地方見阿睦爾  
撒納始知其背叛情由留住月餘因軍營遣往  
曉諭之厄魯特兆齊到彼阿睦爾撒納繕寫奏

招給與駝馬一併遣回阿睦爾撒納現在游牧  
地方患病死傷者甚衆人亦窮困肆行搶掠計  
其兵丁不過二千有餘同伊在彼者係額林沁  
伊什丹津巴特馬車凌達瓦占布根敦扎卜策  
伯克敦多克舍楞敦多克曼集索薩齊布林巴  
圖濟爾噶爾鄂博什固穆扎卜巴桑塞克塞烏  
勒木濟等十餘人其餘俱不能認識看來事勢  
窮蹙阿逆必逃入哈薩克境內現將阿布齊等



遣來入

覲之人俱留於彼處等語又據遣往曉諭阿睦爾撒  
納之兆齊稟稱十月二十九日前往阿睦爾撒  
納處宣示

諭旨阿睦爾撒納屏人密問伊游牧人衆現在何處  
我告以奉

旨將爾游牧人衆移住塔米爾地方之內並未殺戮  
爾妻子已往內地乞恩於

聖主之前現亦無恙爾所遣宰桑阿睦爾濟爾噶爾  
等已經挈獲審訊又詳察阿睦爾撒納屬人等  
均因家室離散人人含怨約計伊游牧內馬匹  
不過千餘駝隻不及一千牛羊等項已屬無餘  
生計甚窘等語奏入報

聞

壬申

命原任厄魯特散秩大臣賽音綽克托之弟賽音伯

勒克為散秩大臣

甲戌

命安插布圖庫人衆

上諭軍機大臣曰據和起等奏稱從前投誠之布圖庫等原在額爾齊斯阿塔瑪里地方居住懇請歸伊游牧等語現在準夷平定額爾齊斯阿塔瑪里一帶盡入版圖即令其仍回原處未始不可但現在天氣尚寒行走稍艱暫令在巴里坤居住俟擒

獲阿逆後再令伊等由額爾哈畢爾噶一路遷回  
原處居住

參贊大臣達爾黨阿疏奏普爾普懇請派兵効  
力情形

達爾黨阿奏言據普爾普告稱荷蒙

皇上天恩補授散秩大臣急圖報効現在自己里坤  
起程至我游牧地方不過五六日之程游牧內  
有戶口一千有餘可選兵一千名懇先派一人

偕往游牧若我弟鄂爾奇木濟已領兵前進我  
再選派兵三四百名由薩爾海地方會合大兵  
一同進剿擒拏逆賊等語臣等即與彼約定令  
藍翎兆垣偕普爾普起程前往奏入報

聞

丁丑

叅贊大臣玉保疏奏進剿阿巴噶斯情形

玉保奏言臣帶領哨探信兵於十二月十九日

抵哈齊克地方據輝特台吉諾爾布告稱聞阿睦爾撒納現在博羅塔拉居住納木奇在烏蘭烏蘇納林居住哈丹額林沁等在阿睦爾撒納附近晶河托多克等處居住近月間阿巴噶斯曾獨往安集哈雅博木地方居住近因往來人少未得確信至阿巴噶斯之五得泰人等現在烏蘭烏蘇西喇特克等處游牧大兵前行指日可到等語臣與尼瑪等商議如兩路整兵前往

將納木奇阿巴噶斯部落分路攻擊相隔遙遠  
軍勢稍分現在一面遣人招降納木奇一面先  
將阿巴噶斯之五得秦人等勦滅收其馬匹牲  
隻換給官兵再抵安集哈雅博木地方擒拏阿  
巴噶斯更為迅速奏入報

聞

戊寅

命賞散秩大臣布林銀一百兩衣一襲授伊犁台吉

諾爾布敦多克等來使鄂爾奇木濟烏特巴拉  
韋諾克鄂斯庫齊木伯勒等為三等侍衛各賞  
銀五十兩衣一襲

已外

命郡王品級塞卜騰之子巴桑承襲貝勒

上諭軍機大臣曰據阿蘭泰奏稱郡王品級貝勒塞  
卜騰前赴軍營中途病故等語塞卜騰自入覲以  
來深知感戴朕恩遇事誠心効力人亦明白令聞



身故深堪憫惻著賞銀一千兩經理喪事其貝勒  
職銜即著伊子巴桑承襲

辛巳

命賞內大臣尼瑪世職

上諭軍機大臣曰內大臣尼瑪深感朕恩伊同游牧  
時即將該鄂拓克內派撥兵丁馳赴軍營甚屬奮  
勉著加恩賞給騎都尉世職即於伊子內指名具  
奏令其承襲

壬午

命授厄魯特忒克錫卓奇克三雅布達勒等為藍翎

侍衛

甲申

命授厄魯特兆齊為侍衛

上諭軍機大臣曰從前北路軍營遣往阿睦爾撒納

傳諭之厄魯特兆齊令與侍衛順德訥同同著加

恩授為藍翎侍衛並著哈達喀等將伊妻子查出

給還令在察哈爾居住

丁亥

定西將軍策楞等疏奏進勦阿巴噶斯游牧

策楞等奏言臣等領兵至和洛霍澌地方聞阿巴噶斯得木齊班咱游牧在嗎呢圖山中隨帶兵前進遇阿巴噶斯得木齊哈丹西喇布爾古特收楞額得勒克恩克等投誠前來臣等公同詢問據哈丹等告稱我等受

大皇帝厚恩各安生業不意宰桑阿巴噶斯與阿睦  
爾撒納同惡相濟肆行叛逆我等被脅服從今  
天兵已到情願投誠其餘得木齊等亦俱在山林叢  
密中紛紛逃避至宰桑阿巴噶斯前月內為阿  
睦爾撒納傳往哈丹聞大兵已至帶附近游牧  
兵丁三四百名不知遷徙何處其衆得木齊等  
若蒙寬宥即當送信前往俱來投誠並擒送哈  
丹贖罪又阿睦爾撒納現在博羅塔拉昨阿巴

噶斯遣人告稱伊犁喇嘛宰桑等請阿睦爾撒  
納於本月十七日坐台吉林等語臣等伏思逆  
賊阿巴噶斯屬人理宜全行誅戮但我兵一到  
即行投誠情尚可恕隨令曉諭各得木齊等共  
擒哈丹免其誅滅如果出力事成後奏明加

恩臣等即帶領前進其班咱游牧已經收取并將伊  
弟喇嘛達什藏布擒拏所有家口牲畜盡行收  
獲奏入報

聞

己丑

命封內大臣尼瑪公爵

定西將軍策楞等奏言十二月二十八日投誠  
之收楞額恩克帶領由哈丹處前来之阿克蘇  
告稱哈丹在游牧居住聞知大兵將到正思逃  
避忽阿巴噶斯處遣人前來自稱現在伊犁喇  
嘛宰桑等會同將軍薩喇爾前往伊犁阿底斯

巴克地方擒拏阿睦爾撒納特令哈丹前去哈  
丹即帶阿巴噶斯妻子二十餘口連夜逃往等  
語臣等竊思哈丹棄置游牧僅攜數口奔竄明  
係與阿巴噶斯約定逃避應即遣兵追拏正擬  
派員前往內大臣尼瑪情願領兵追勦臣等即  
選精兵一百名令阿敏道同伊速往搜捕奏入  
上諭軍機大臣曰據策楞奏稱哈丹攜帶阿巴噶斯  
妻子脫逃內大臣尼瑪領兵前往追捕等語尼瑪

自到軍營以來頗著勞績今又能勇往任事殊屬  
可嘉尼瑪原係布魯古特台吉之裔著施恩晉封  
公爵仍辦理圖什墨勒事務

庚寅

諭定西將軍策楞等偵探阿逆實在情形

上諭軍機大臣曰朕覽策楞所奏伊犁台吉宰桑等  
在阿底斯巴克地方圍困阿睦爾撒納一事此言  
尚屬可疑聞勒奇嶺博羅布爾噶蘇台兩處隘口



皆設兵堅守阿睦爾撒納勢不能越至阿底斯巴  
克地方詢之現在京師之布林鄂齊爾等俱言似  
非實在情形此必係阿逆勢窮力竭揚言伊在彼  
被圍使我軍聞信不往博羅塔拉擒拏伊得乘間  
兔脫以為緩軍之計著傳諭策楞等悉心偵探究  
竟阿逆潛踪何處領兵直入尼瑪玉保等俱已前  
進並即速知會伊等務須探問明確前往追捕毋  
為浮言所惑

諭叅贊大臣玉保等進兵事宜

玉保奏言臣於十二月二十九日行至鄂什默特河聞有阿巴噶斯屬人三十餘戶在彼居住即派兵前往勦滅並收獲其牲隻除得木齊哈丹得勒克已經投順其得木齊班咱等得秦人衆藏匿山內並行搜捕其餘阿巴噶斯屬人聞俱在大小安集哈雅兩處居住俟到彼時乘機辦理奏入

上諭軍機大臣曰現在我兵既已深入而尼瑪又同  
阿敏道行走則後隊續進兵丁為數無多策楞玉  
保理應同行方為妥協今據玉保奏稱剿滅阿巴  
噶斯人衆則玉保又與策楞分兵前進伊等但因  
賊人散處遂各分兵前往然此際自應以擒挐首  
惡阿睦爾撒納及阿巴噶斯哈丹等為要著傳諭  
策楞玉保伊二人務須併力前進相機籌畫速期  
成功以副朕委任之意

辛卯

命革富德叅贊大臣

上諭軍機大臣曰據富德奏稱現在催令噶爾藏多  
爾濟作速進兵並稱巴雅爾未經遣人赴額林沁  
去等語此奏未諳事機噶爾藏多爾濟因伊子病  
故傷悼成疾乃情理之常朕尚降旨令其善為調  
攝至巴雅爾因馬匹不敷亦係實情況現在伊犁  
喇嘛宰桑等出兵追拏阿睦爾撒納是噶爾藏多

爾濟之兵已可不遣至和通鄂勤曾經途遇布林  
則巴雅爾未遣使於額林沁想已知布林前來之  
信耳富德不論事之輕重惟恐與伊前奏不符喋  
喋陳奏所見殊屬鄙小富德著革去叅贊大臣仍  
留副都統職銜專管台站事務一切軍營事宜毋  
得干預

甲午

命叅贊大臣哈薩克錫之子額爾德尼莽鼐鼐承襲

騎都尉世職

定西將軍策楞等疏稱分兵進剿事宜

策楞等奏言據內大臣尼瑪等將哈丹於弟庫圖齊投誠前來送至軍營臣等詳細詢問據稱去年十月間我與烏克圖及伊犁喇嘛等議定與將軍薩喇爾公丹拜等協同擒拏阿睦爾撒納約於十一月初一日在博羅布爾噶蘇台圍勒奇嶺兩路會齊我與公丹拜約蘇圖錫克錫

爾格等帶兵二千名於初三日到博羅布爾噶  
蘇台守候十日並無諾爾布敦多克與將軍薩  
喇爾同來之信因暫回游牧以圖再舉後至諾  
爾布敦多克處詢問知伊發兵稍遲未得會合  
又因敦多克曼集之弟將我等密商之事告知  
阿睦爾撒納豫為防備十二月十五日將軍薩  
喇爾及諾爾布敦多克錫克錫爾格等在伊犁  
諾羅斯哈濟拜姓地方與阿睦爾撒納相遇十

五十六兩日彼此對敵衝殺阿睦爾撒納與同  
人和卓木連合共計兵四千有餘其勢頗盛遂  
各四散正欲前來投誠適內大臣尼瑪遣人傳  
諭遂即前來現在錫克錫爾格等因未得成事  
各懷疑懼看來未必復能聚兵等語臣等伏思  
伊犁喇嘛宰桑等感戴

皇恩協同擒拏阿逆贖罪心甚誠篤但事機不密兵  
力不齊未得集事今錫克錫爾格既帶領游牧



與薩喇爾等一同由朱爾都斯前來或復整兵  
威以圖再舉亦未可定令阿睦爾撒納已入伊  
犁宜仍遵前

旨兩路進兵併力搜捕計危爾錐音等日內可抵軍  
營仍令伊等帶兵三千名由朱爾都斯一路前  
進臣等仍領兵勦滅阿巴噶斯等游牧直抵伊  
犁並將現在辦理情形遣人知會薩喇爾錫克  
錫爾格等以期會合再阿逆已入伊犁且與和

卓木連合我兵兩路夾攻賊勢窮困勢必逃往  
同人地方亦應仍遵前

旨令納噶查等往阿克蘇城曉諭擒拏又據叅贊大  
臣哈薩克錫喇等報稱領兵至瑪納斯地方聞  
有台吉達什帶領百餘人居住即派兵前往收  
服隨據達什帶領伊子賽音伯勒克等前來投  
誠情願出兵効力至和洛霍淞河地方擒獲阿  
睦爾撒納信用之宰桑察袞並伊子巴朗及屬

人等現派侍衛布瞻泰解送來京其阿巴噶斯  
屬下得木齊達什巴圖等在大小安集哈雅地  
方經臣玉保等將達什巴圖三百戶俱已勦滅  
奏入

上諭軍機大臣曰策楞等奏稱據庫圖齊告知伊犁  
現在情形伊等即與厄爾錫音等分路進兵等語  
策楞等聞知此信即議分路前進甚合機宜朕意  
庫圖齊所言尚屬可疑未必非阿逆詭謀冀緩大

兵前進之計令策楞等不為所惑分道夾攻計日  
自可就獲至阿逆雖已前往伊犁其所居塔爾巴  
噶台博羅塔拉等處應尚有存留之人著派尼瑪  
帶兵數百名前往勦滅以分賊勢其阿巴噶斯哈  
丹二人雖力窮來降亦斷不宜寬貸伊等早經歸  
順乃助阿逆為亂情甚可惡如果知罪將阿逆擒  
獻來降不特免其誅戮尚當加恩如僅束身來降  
仍即行正法以彰國憲著曉諭庫圖齊令其轉告

阿巴噶斯知之至察袞亦係助惡之人今既擒獲  
即嚴加看守押解來京治罪伊妻係都爾伯特汗  
策凌之女著加恩寬宥策楞等即交哈薩克錫喇  
安置甚屬妥協俟事竣後策凌等移住舊游牧時  
仍令與策凌同住再厄爾雖音係準噶爾舊人甚  
屬幹練令既領兵由朱爾都斯進發著加恩照將  
軍體制統領辦事以鄂實為叅贊大臣遵照前旨  
諸事聽其措畫悉心辦理朕意再派吞圖布偕厄

爾錐音同行更屬有益此旨接到若厄爾錐音已  
經前進吞圖布亦毋庸更往仍令隨策楞等辦事  
現據鄂實奏稱遵將軍檄文即在特納格爾軍營  
整齊兵馬剋期前進等語伊等領兵前往遇見薩  
喇爾即將加恩厄爾錐音統領大兵之處詳悉諭  
知因厄爾錐音曾在準部辦理圖什墨勒事務招  
降人衆易於集事若薩喇爾乃係受恩最久之人  
自能仰承朕意與厄爾錐音會晤時一切事宜俱

應從厄爾錐音指示和衷共濟惟期迅奏膚功以  
副委任其納噶查等即遵前降諭旨輕騎前往阿  
克蘇城曉諭衆回人等如遇阿逆逃竄往彼即行  
擒獻

諭定邊左副將軍哈達哈等進兵事宜

上諭軍機大臣曰策楞厄爾錐音等現在分路進兵  
所有北路兵丁前經哈達哈等奏請前往博爾塔  
拉協罕逆賊繼又停止進發今已值春令上年此

時即已進發著傳諭哈達哈等帶領現在兵丁緩行至阿爾台以外不必深入揀選水草充足地方牧放馬匹使賊聞知西北兩路進兵進退無措中途遇各部落人衆應行擒剿安撫分別辦理倘阿逆迫於西路之兵逃避前來即行擒拏哈達哈等務宜悉心籌畫妥協辦理

乙未

叅贊大臣達爾黨阿等疏奏會同副將軍薩喇



爾進兵事宜

達爾黨阿等奏言副將軍薩喇爾帶領衆宰桑  
台吉等由朱爾都斯一路前來已遣喀爾喀公  
恭格敦丹宰桑巴桑錫克錫爾格侍衛敦多克  
旺扎爾喀爾喀協理台吉博爾綽對等於正月  
十三日至軍營懇發兵至塔什罕地方接應薩  
喇爾現離軍營不過三日之程臣等即派副都  
統職銜瑚爾起帶兵速行往迎其此處現有兵

丁作速豫備前進各路未到之兵亦即飛行催  
趙現在策楞處辦事之人甚多而朱爾都斯一  
路僅令厄爾錫音鄂實前往恐索倫厄魯特兵  
丁管轄難周臣等擬俟薩喇爾到時臣達爾黨  
阿富德哈寧阿瑚爾起等陸續按隊由朱爾都  
斯一路前進奏入

上諭軍機大臣曰達爾黨阿等奏稱薩喇爾領兵由  
朱爾都斯前來已遣喀爾喀公恭格敦丹等先至

俟其到時即會同前進擒勦逆賊等語薩喇爾帶  
領喀爾喀王公等辦事伊犁原無重兵駐劄一旦  
中賊詭謀被圍受困朕甚深軫念今能奮身歸來  
不特不加罪譴俟阿逆擒獲後尚當格外施恩著  
將此明白曉諭薩喇爾等此時現在同來者若干  
人其尚留彼處者若干人並陣亡及病故者俱交  
與薩喇爾查明奏聞分別加恩薩喇爾錫克錫爾  
格巴桑俱遠道前來將來又即領兵深入俱著加

恩各賞銀三百兩錫克錫爾格巴桑並授為散秩  
大臣諾爾布敦多克前已降旨封授公爵其同來  
之喀爾喀察哈爾厄魯特等俱著酌量賞賜令其  
製裝仍往軍營効力所有定邊右副將軍印原係  
薩喇爾掌管今應仍行給與昨命厄爾錐音由朱  
爾都斯進兵伊在準部原辦圖什墨勒事務人甚  
歷練是以令其統領大兵照將軍體制辦事且其  
年較薩喇爾為長今與薩喇爾同隊其定邊右副

將軍印著伊二人公同掌管其奏事列名應以厄爾錐音為首扎拉豐阿此時已應與策楞同在一處即著在叅贊大臣上行走不必更用副將軍印伊等務期屏去形迹和衷共濟方為無負任使前據哈達哈等奏稱將回人阿底斯等遣往西路効力即交與厄爾錐音等帶領前往以便招服各部落回人但此內有與阿逆同謀者不可不加以意覺察如有形迹可疑之人即行正法現據錫克錫爾

格等告稱彼處回人附從逆賊甚屬可惡且能資  
給阿逆馬匹進兵時即將回人等牲畜收取亦可  
以增我兵力再特訥格爾一帶現有臺站事務富  
德不必同達爾黨阿等進兵仍著駐劄彼處辦事  
頃兆惠亦知薩喇爾前來之信奏請帶兵由吐魯  
番往迎已降旨停其前往著即前赴特訥格爾會  
同富德辦理臺站事務

諭定西將軍策楞等進兵伊犁事宜

上諭軍機大臣曰現聞阿逆已底伊犁大兵應速行  
進發所有各處兵丁俱已齊集即陸續繼至之兵  
亦絡繹奔赴策楞等此時若少為延緩則賊勢愈  
固殊於機宜未為允協逆賊自博羅塔拉遷至伊  
犁伊犁雖與博羅塔拉形勢不殊然究為準噶爾  
總匯之地阿逆在彼施其奸計衆人易於脅從益  
增黨羽大兵速進即不能一時擒獲將伊脅從之  
人先行剿滅亦足以張軍威或將阿逆逐出伊犁

使其窮無所歸自可計日就俘倘伊堅拒自守我  
兵即踞形勝之地將伊圍困日久內變自生必有  
擒獻軍門邀恩封賞者此等情形皆可豫料策楞  
等務期加意辦理從前伊犁喇嘛等皆稱擒賊贖  
罪朕即降旨令將伊等寬宥免其誅戮大兵前進  
喇嘛等如果即時迎降著仍遵前旨辦理若又順  
從阿逆則反覆無常斷不容恕應即嚴行勦滅其  
額林沁巴特瑪車凌等如能擒獻逆賊束身來歸



策楞即准其來降以分賊勢倘執迷不悟至事勢窮蹙方來乞命著即將伊等正法毋得少為姑息從前存貯伊犁緞足銀兩聞係宰桑巴朗管理策楞等到彼巴朗若能將原物交出即奏聞加恩以示鼓勵再前議令沙克都爾曼濟之子圖們等帶兵協擒阿逆令沙克都爾曼濟量已抵策楞軍營應即設法通信圖們等派兵擒拏使逆賊無所逃遁何以並未籌及此時惟在早抵伊犁則諸事皆

可就緒策楞等其仰體朕心奮勉從事毋稍逡巡  
觀望坐失事機

丙申

定西將軍策楞等疏奏兩路大兵會合進剿事  
宜

策楞等奏言臣等遵

旨派厄爾錐音等帶兵由朱爾都斯一路進發十二  
月初七日厄爾錐音達什策凌拉蘇隆鄂卓特

皆抵軍營公同商議據厄爾錐音告稱現在烏魯特克勒特綽和爾等鄂拓克俱已歸順

天朝我等再派兵三千協同辦理可以剋期告捷擒獻逆賊但我部落中可派之兵甚少其別部鄂拓克之兵又恐呼應不靈現在巴雅爾帶兵四百名前來可否即令巴雅爾統領我盡心協助於事實有裨益等語臣等即照伊所請一面差人往迎巴雅爾會同前進其臣等所領兵丁現

在扎拉豐阿已起程前來軍營並行文富德將  
續到兵丁催趲速至共計五千名分路進發與  
厄爾錐音等約定日期併力擒勦奏入

上諭軍機大臣曰策楞等與厄爾錐音等分路進兵  
令巴雅爾統領現在進發但觀伊等約定日期稍  
覺遲滯蓋伊等尚未知薩喇爾前来之信是以如  
此商議此時應已知悉而朕昨所降諭旨策楞等  
接到後自當遵照辦理大兵早抵伊犁則諸事早

得就緒策楞等亦無庸俟兵至五千始行進發現  
在繼進兵丁亦陸續可到前後原可策應惟在迅  
速趨赴方合機宜朱爾都斯進發之兵派巴雅爾  
統領原屬可行令既有達爾黨阿會同進發不若  
竟交達爾黨阿統領達爾黨阿係協辦大學士更  
兼公爵軍中以公大學士帶領兩副將軍為名則  
阿逆聞之必以為大學士公傳恒前往傳恒荷朕  
倚任為阿逆所素知伊當窮蹙之時或求傳恒代

為乞恩全其身命亦未可定如遣人先至達爾黨  
阿宜隨機應變使其不覺若束身前來即行擒拏  
解送京師第阿逆詭詐百端達爾黨阿等須加意  
防範並將此曉諭厄爾錐音薩喇爾等一體留心  
商酌辦理仍將兩路大兵何時可抵伊犁之處即  
行奏聞

丁酉

定西將軍策楞等疏奏遣厄爾錐音曉諭烏魯

特等

策楞等奏言臣等公同會商伊犁喇嘛宰桑等  
悔罪輸誠發兵擒賊第人心渙散未得集事今  
宜急遣一人前往撫慰衆心厄爾錫音係準噶  
爾舊人從前噶爾丹策零曾給以調遣衆鄂拓  
克兵馬印記伊情願先至烏魯特地方將大兵  
前來擒討逆賊緣由通行曉諭喇嘛宰桑等並  
相機行事離其黨羽即由烏蘭烏蘇小路起程

前往奏入報

聞

叅贊大臣達爾黨阿疏奏進兵日期

達爾黨阿等奏言臣等會同噶爾藏多爾濟商  
議現在進兵閱勒奇博羅布爾噶蘇台二嶺雪  
大路窄阿逆以據伊犁必守此二嶺今由朱爾  
都斯前往至烏魯特游牧即調集伊等兵丁併  
力速進較為妥協再此時若待巴里坤兵馬調




齊不免遲滯是以臣達爾黨阿富德即帶索倫兵八百名於正月十五日起程往迎副將軍薩喇爾噶爾藏多爾濟亦即帶兵起程約於十七日在積水薩地方會集奏入

上諭軍機大臣曰達爾黨阿富德等不俟薩喇爾迎來即帶領現在所有兵丁向朱爾都斯進發甚合機宜富德前因辦事乖張令其不必在叅贊大臣上行走駐劄特訥格爾專管臺站事務令既已進

兵意尚勇往著仍授為叅贊大臣毋庸回至特訥  
格爾辦事其臺站事務著兆惠會同莽阿納辦理  
戊戌

定西將軍策楞疏奏勦滅阿巴噶斯游牧人衆  
策楞奏言據叅贊大臣玉保報稱數日內勦戮  
阿巴噶斯所屬達什巴顏等五得秦三百餘戶  
又據叅贊大臣尼瑪等報稱共降阿巴噶斯所  
屬九得秦人衆等語臣即行文尼瑪等將投誠

人等俱令居住原處收其馬匹牲畜以資兵力  
仍令酌量出兵隨同効力並飭交庫圖齊嚴行  
約束并據王保等送到四項牲畜俱已分給官  
兵奏入報



平定準噶爾方略正編卷二十四

# 欽定四庫全書

史部

平定津噶爾方略正編卷二十五至

七

詳校官監察御史<sub>臣</sub>孫家賢

通政使司副使<sub>臣</sub>莫瞻菴覆勘

總校官進士<sub>臣</sub>朱鈴

校對官編修<sub>臣</sub>周厚轅

謄錄監生<sub>臣</sub>汪瀾

欽定四庫全書

平定準噶爾方略正編卷二十五

乾隆二十一年春二月庚子

諭駐劄烏里雅蘇台辦事大臣阿蘭泰擒治訥默庫

等事宜

上諭軍機大臣曰據舒明奏稱厄魯特部人擅殺臺  
站侍衛並據厄魯特侍衛丹津告稱訥默庫帶伊  
游牧人等移至額克喇勒時即欲逃叛等語看

來訥默庫已露背叛情形著即傳諭阿蘭泰令將駐劄烏里雅蘇台及附近喀爾喀兵丁酌量飛調帶領堵截其烏里雅蘇台軍營存貯錢糧派兵加意防守阿蘭泰追及訥默庫如果抗拒即行誅戮所有屬人照阿睦爾撒納屬人一例辦理擒拏訥默庫時並將伊宰桑察罕鼐濟巴圖濟爾噶爾烏察喇勒等一併拏獲伊等從前在熱河時面奏訥默庫必不生事今若隨同逆賊逃竄情理可惡必

應重治其罪如訥默庫尚無背叛實據即將丹津  
首告情節諭知令其至烏里雅蘇台與丹津質對  
俟到時將丹津一并拏解來京仍諭知管解人員  
解至察哈爾附近地方即將丹津釋放並將加恩  
授丹津為散秩大臣令在察哈爾居住之旨密行  
曉諭丹津俾伊不生疑懼其訥默庫同部之剛多  
爾濟巴圖博羅特等曾勸阻訥默庫逃竄著明白  
傳諭伊等仍照舊安居不因訥默庫一人致受株

累再昨經降旨令哈達哈帶兵往阿爾台一路前進今既有此事應即帶領兵丁在各處卡倫防守毋使逆賊得以乘間脫逃

辛丑

定西將軍策楞疏報擒獲阿巴噶斯等妻孥

策楞奏言據內大臣尼瑪等報稱正月十二日遣察哈爾副驍騎校巴圖孟克等偵知哈丹潛往濟爾哈朗地方躲避遂將阿巴噶斯哈丹等



妻子擒獲前來臣等伏思尼瑪等帶兵擒拏哈丹乃先期豫行逃竄祇擒獲其妻孥可否免其議處奏入

上諭軍機大臣曰策楞奏稱尼瑪等未經擒拏哈丹止獲阿巴噶斯哈丹等妻孥並招降衆得木齊等功罪相等應否免議等語尼瑪受朕深恩奮勇効力已擒獲阿巴噶斯哈丹妻子及招降衆得木齊哈丹聞風先遁尼瑪等非退縮不前有心縱賊者

可比著策楞曉諭伊等免其處分仍觀後效再現  
在大兵兩路前進哈丹又逃往阿逆處軍中情形  
阿逆必已知悉或逞其詭計別生事端或畏懼逃  
竄遠處俱未可定策楞等務須相度機宜迅速前  
往

壬寅

命獎賞厄魯特克什克

上諭軍機大臣曰策楞等奏稱阿巴噶斯屬人克什

克知阿巴噶斯搶奪臺站前來送信並養贍臺站  
被掠兵丁等語克什克係一間散厄魯特頗知大  
義著施恩授為藍翎侍衛賞銀五十兩以示鼓勵  
定邊左副將軍哈達哈疏報領兵起程日期

哈達哈奏言前派護軍統領塔爾瑪善貝勒策  
卜登等帶兵一千名由北路進發現在已過烏  
蘭嶺等處臣等因尚未得擒獲逆賊之信亦帶  
領索倫喀爾喀和托輝特等兵二千餘名於正

月二十二日由布延圖起程向阿爾台進發其  
在科卜多及烏哈爾和碩地方駐劄兵丁仍令  
哈爾哈公米什克等帶領防守新舊烏梁海等  
仍留兵三千名遵

旨交與成衮扎布舒赫德等在烏里雅蘇台駐劄奏  
入報

聞

癸卯

命給駐劄巴里坤辦事大臣和起等欽差大臣關防  
駐劄巴里坤辦事大臣兆惠等疏奏遣公納噶  
查前往阿克蘇城日期

兆惠等奏言接到將軍策楞咨應遵前奉

諭旨遣公納噶查前往阿克蘇城曉諭擒賊事宜臣  
等即派撥兵丁三百名辦給馬匹口糧令公納  
噶查帶領侍衛官長保默得庫等於正月二十  
二日起程奏入報

聞

乙巳

諭叅贊大臣達爾黨阿進兵事宜

上諭軍機大臣曰達爾黨阿奏稱薩喇爾已抵吐魯  
番伊等即與噶爾藏多爾濟等帶兵往西爾哈阿  
濟爾罕等處會齊現已先期往約薩喇爾等語所  
辦甚合機宜前巴桑等已回游牧地方錫克錫爾  
格現與達爾黨阿等同隊前進至伊等游牧時酌

量調兵合之現在索倫兵丁看來足敷調遣原不必候薩喇爾前來始行進發但昨據和起等奏到薩喇爾至吐魯番即遣阿喇勒拜通信巴里坤已經和起等派巴祿帶兵往迎即由彼處會合前進著達爾黨阿即速寄信薩喇爾令其暫為駐兵俟達爾黨阿到彼一併進發

諭定邊左副將軍哈達哈等加意防守卡倫

上諭軍機大臣曰據阿蘭泰奏稱接到舒明所寄訥

默庫背叛情形即調各處兵丁豫備並遣人詢問  
策凌等語辦理殊未妥協阿蘭泰既得訥默庫信  
息應作速領兵并帶同丹津前往擒拏今紛紛派  
兵防護必至洩漏著傳諭哈達哈等凡各處卡倫  
務須派兵前往加意防守仍密行籌辦毋使聞風  
脫逃

諭定西將軍策楞查辦事宜

上諭軍機大臣曰前聞內大臣公瑪木特由閩勒奇嶺



前來曾派伊孫扎木禪往迎並未相遇今又閱數  
月瑪木特尚無信息朕心甚為軫念著策楞留心  
訪問現在何處即行奏聞再沙克都爾曼濟曾告  
知富德從前阿睦爾撒納班珠爾納噶查等將準  
噶爾鄂拓克人等私自占據等語納噶查上年在  
伊犁時原依附阿逆行事占據別部落人衆後因  
伊至熱河即將阿逆背叛情形據實供出是以施  
恩寬免仍令其赴軍前効力然其人終不可信事

竣後必至故智復萌亦著策楞留心查辦毋得任其占據

丙午

定西將軍策楞等疏奏辦理歸降人衆事宜

策楞等奏言據庫圖齊告稱噶勒雜特宰桑特克勒德克一鄂拓克及數集賽人等皆願投誠請遣伊兄瑪爾達勒前往招降又遣人寄信阿巴噶斯哈丹烏勒木濟等令其擒賊贖罪臣等

俱照伊所請辦理今庫圖齊帶領伊兄瑪爾達  
勒及阿巴噶斯得木齊達什策凌等哈丹鄂拓  
克得木齊沙喇薩琿等招降前來其阿巴噶斯  
游牧接壤居住之八得秦人等皆誠心歸順懇  
請供給官兵馬匹口糧臣等即宣示

恩旨令其隨大兵効力奏入報

聞

丁未

諭定西將軍策楞等防範阿逆事宜

上諭軍機大臣曰昨據策楞等奏哈丹等棄其妻子  
逃往阿逆駐劄地方看來阿巴噶斯哈丹並無帶  
兵豈能擒獻阿逆況阿逆詭計百端聞知大兵前  
進故令阿巴噶斯等前來迎接引軍深入伊得逞  
其狡詐不可不小心防範總之阿巴噶斯等能擒  
阿逆縛獻軍門方准其來降若僅隻身來歸即將  
伊等拏獲嚴審究出實情一切俱遵前降諭旨辦

理此時凡遇阿逆處前來之人俱宜詳加體察毋墮奸計著詳悉傳諭策楞等知之

戊申

命授兆惠叅贊大臣同達爾黨阿等領兵進剿

上諭軍機大臣曰兆惠等奏稱接薩喇爾吐魯番來信即遣人令其由彼處進兵並赴特訥格爾會同商議等語兆惠辦理甚合機宜前曾降旨令兆惠至特訥格爾辦理臺站事務今著傳諭兆惠伊到

特訥格爾若事務繁多即留彼處辦事如一切尚  
易料里即著會同達爾黨阿等領兵進勦在叅贊  
大臣上行走其特訥格爾臺站事務交與三格管  
理并傳諭和起等所有巴里坤一應事務俱照兆  
惠所定章程悉心經理

密諭定西將軍策楞等進兵事宜

定邊右副將軍薩喇爾奏言臣荷蒙委任駐劄  
伊犁遇賊竊發不能盡力勦滅致將軍叅贊大

臣等捐軀盡節臣力窮被執自知徒死不足以  
塞責隱忍偷生希圖報効遂與台吉諾爾布敦  
多克等聚集兵力協擒阿逆自贖前愆上年十  
二月內與阿逆交戰數日因力不能敵未獲擒  
獻隨帶同諾爾布敦多克等由吐魯番前來正  
月初九日至吐魯番地方據回人伯克莽噶里  
克告稱噶爾藏多爾濟等現在領兵擒拏阿睦  
爾撒納伊等公同盟誓俟擒獲阿睦爾撒納後

即領兵向各游牧搶掠且以噶爾藏多爾濟之  
子諾爾布林沁立為總台吉管轄四衛喇特已  
先遣布魯古特尼瑪前往等語又聞葉克明安  
巴雅爾等知臣至吐魯番帶兵前來意不可測  
幸臣于伊等未到之前已先入城尚未舉動後  
聞巴里坤調兵將至伊等始回看來準噶爾人  
等反覆變亂全不可信以臣愚見必調取西北  
兩路兵三四萬併力進勦擒拏阿逆並將衆部



落人等分別勦滅安撫所有準噶爾等兵丁似  
不可用奏入

上諭軍機大臣曰兆惠等將薩喇爾所奏準噶爾情  
形及請派兩路大兵進勦一摺轉奏前來此次薩  
喇爾甚有畏懼準噶爾之心又恐來京治罪是以  
故難其說為此陳奏今大兵將抵伊犁若如薩喇  
爾所奏必待大兵三四萬始可前進則機會已失  
必致墮賊奸計因降旨令其即同達爾黨阿進勦

然伊既懷疑懼未必能盡心擒賊以圖報効即使  
前往亦屬無益策楞達爾黨阿竟不必候薩喇爾  
偕行即同厄爾錫音哈薩克錫喇等作速進兵即  
薩喇爾趕赴一切緊要機宜不必與之商酌伊所  
奏準噶爾人等全不可信之語亦不無所見然如  
噶爾藏多爾濟巴雅爾沙克都爾曼濟等朕已加  
恩俱封為汗其心更何所希冀巴雅爾屬人貧苦  
或向回人等擄掠勢不能免若謂其領兵欲擒薩

喇爾此非情理所有又尼瑪現在哨探隊內行走  
勦滅阿巴噶斯等游牧頗著勞績而彼處傳言乃  
謂係噶爾藏多爾濟等所遣薩喇爾誤聽回人之  
言不察虛實信以為真著明白傳旨曉諭令其無  
庸疑慮至阿逆詭計百出知噶爾藏多爾濟等現  
在軍中或遣人前來煽誘亦未可定不若將此情  
節詳悉曉諭伊等不使為逆賊所惑而阿逆亦無  
從更施伎倆策楞等務宜詳慎辦理

庚戌

命授宰桑庫圖齊為散秩大臣

上諭軍機大臣曰庫圖齊自上年投誠以來詳報一應事宜復致信阿巴噶斯等令其擒賊贖罪甚屬可嘉著加恩授為散秩大臣

辛亥

叅贊大臣達爾黨阿疏奏派兵擒拏唐古忒事

宜

達爾黨阿奏言唐古忒乃逆賊阿睦爾撒納之族去年十一月內將軍策楞調派伊游牧兵丁帶領前進時唐古忒僅領兵一百名帶來駝馬俱疲瘦不堪應用勉強塞責行走五六日即隱避山僻處所觀望不前及遣人往伊游牧察看實可派精兵六七百名馬匹駝隻亦復不少唐古忒復探知阿睦爾撒納已入伊犁欲乘機由哈卜塔克拜塔克一路往尋逆賊詭傳將軍兵

敗搖惑衆心形迹詭秘種種可疑應速行擒治  
臣等公同商議派富德莽阿納帶領噶爾藏多  
爾濟及厄魯特兵五百名前往辦理奏入報

聞

壬子

命賞給三格副都統職銜

上諭軍機大臣曰三格自革職後効力軍營尚屬黽  
勉著加恩賞給副都統職銜以示鼓勵

甲寅

諭駐劄烏里雅蘇台辦事大臣阿蘭泰等查辦訥默  
庫事宜

上諭軍機大臣曰據舒明奏訥默庫屬人沿途並無  
搶掠馬駝之事其戕害侍衛一節未經查明此事  
若亦與訥默庫無涉則其叛迹尚無實據著傳諭  
阿蘭泰舒明如未將訥默庫擒治訥默庫亦未經  
知覺暫行停其拏問若已經拏問仍與丹津一併

解送來京再行查辦仍會同策凌策凌烏巴什等  
究出戕害侍衛之人即行正法以示儆戒

命安插班禪額爾德尼之沙畢納爾等

上諭軍機大臣曰據哈達哈等奏稱遵旨詢問自伊  
犁來歸之沙畢納爾沙喇哈什哈巴爾沁等原係  
班禪額爾德尼舊人懇請仍往青海之柴達木居  
住等語著照所請移住安插並傳諭副都統德爾  
素善為管轄



丙辰

諭定西將軍策楞等查辦唐古忒事宜

上諭軍機大臣曰昨據達爾黨阿等奏稱現在領兵  
擒治唐古忒此時應已擒獲從前唐古忒至額林  
哈畢爾噶時曾告知策楞言哈薩克錫喇屬人盜  
其牲畜且稱哈薩克錫喇有依附阿逆之意等語  
此等言語哈薩克錫喇今雖未知日後豈無所聞  
若不明白曉諭恐伊轉生疑慮策楞等俟拏獲唐

古忒之時即於衆人前指出其造言誣陷哈薩克  
錫喇之罪因其言不足為據是以未經奏明今果  
肯叛益信其從前所言之詐俾哈薩克錫喇聞知  
益生感激仍將曉諭後哈薩克錫喇言語情形奏  
聞

丁巳

命封沙克都爾曼濟之子圖們為貝勒

上諭軍機大臣曰沙克都爾曼濟未至伊游牧之先

其弟明噶特將伊游牧搶掠沙克都爾曼濟之子  
圖們尚在幼年能率衆由朱爾都斯前來投順殊  
屬可憫著加恩封圖們為貝勒賞戴雙眼翎仍賞  
銀一千兩為經理生產之資以示體卹並令圖們  
即由額林哈畢爾噶一路前往趕赴沙克都爾曼  
濟令其父子完聚明噶特俟拏獲時即委員解赴  
京師治罪

戊午

諭定西將軍策楞等安輯伊犁各事宜

上諭軍機大臣曰據策楞等奏稱哈薩克錫喇尼瑪  
扎那噶爾布等公同商議將伊等鄂拓克游牧疆  
界先行區畫其各部落無業人等並籌歸併安插  
等語此皆圖什墨勒等應辦之事伊等公同籌辦  
具有條理應俱如所議行其將來歸併安插人等  
生計艱窘著加恩賞給茶餉以資養贍策楞等交  
與圖什墨勒等查明需用數目行文巴里坤辦事

大臣由朱爾都斯就近運往再據伊犁前來人等  
告稱瑪木特約蘇圖俱為阿逆戕害約蘇圖圖什  
墨勒員缺著吞圖布補授吞圖布所遺扎爾呼齊  
員缺著恩克博羅特補授瑪木特年已就衰効力  
行間甚屬奮勉今聞為賊戕害深堪憫惻著加恩  
賞銀三百兩其公爵即著伊孫扎木禪承襲至約  
蘇圖從前附和阿逆行事被禍乃其自取第念伊  
係準噶爾舊人海喇圖納親之孫如有子孫兄弟

著策楞等查明具奏加恩將伊宰桑承襲再現在  
孛獲阿巴噶斯之母及伊妻室係尼瑪諾爾布之  
姊妹尼瑪等既合嗣懇奏且係婦女著加恩寬宥  
交與尼瑪等管轄若阿巴噶斯之子則應治罪之  
人不得倖邀寬典著即查明解送來京

諭定西將軍策楞等派兵協孛唐古忒

叅贊大臣富德奏言臣領兵擒孛唐古忒於二  
月初二日至鄂塔穆和爾地方唐古忒在樹林

蒲葦中扎寨臣等帶兵衝擊殺賊二十餘人查  
唐古忒帶兵一千有餘四面河溝難以衝突是  
夜賊人即由寨內逃出臣等追趕至色白口山  
內賊衆已據險要地方分隊攻擊將賊人所占  
山寨連奪六處斬獲無算唐古忒復行潛遁擒  
獲伊部內屬人據稱唐古忒早萌叛志近得阿  
睦爾撒納已入伊犁之信伊由軍中回至游牧  
即令伊妻子帶領戶口牲畜自哈卜塔克拜塔

克一路先往伊犁現在唐古忒連日戰敗亦由  
此路逃往等語臣即率同噶爾藏多爾濟等奮  
力前進務期勦滅奏入

上諭軍機大臣曰據富德奏稱領兵擊敗唐古忒已  
逃向哈卜塔克拜塔克一路前往伊犁等語著傳  
諭策楞酌派兵丁速往哈卜塔克拜塔克地方堵  
截唐古忒務期擒獲伊即窮蹙投降亦行拏問遵  
照前旨押解來京治罪



定西將軍策楞疏奏宰桑圖布慎等來歸情形  
策楞奏言據阿勒巴齊宰桑圖布慎前來告稱  
上年投誠時蒙

恩授以官職隨將軍等在伊犁辦事不意阿逆背叛  
勉強服從後商同喇嘛等欲將阿逆迎至伊犁  
擒獻我與約蘇圖及喇嘛一名至阿逆處迎請  
伊懷疑不允又與副將軍薩喇爾等領兵與阿  
逆交戰亦未得勝我隱匿山谷今始得乘間來

歸等語又據得木齊恩克博羅特告稱我係巴爾達穆特宰桑博什之得木齊博什前往入

覲我與伊子塔什為阿睦爾撒納逼脅同行今聞大兵已到前來歸誠等語又噶勒雜特宰桑特克勒德克阿勒巴齊宰桑默德庫之子鄂勒錐圖得木齊庫本等俱迎至軍營臣等即帶同伊等前進奏入報

聞

庚申

命加恩陝甘兩省辦解馬匹官兵等

上諭軍機大臣曰據兆惠奏稱此次陝西甘肅官員  
辦解馬匹及滿營綠旗送到馬匹臚分俱足倒斃  
甚少等語此等馬匹皆豫備軍需之用今正值春  
冬之際俱能妥協送到官兵甚屬黽勉其原辦之  
將軍地方官員辦理亦屬妥當並應加恩鼓勵所  
有此次購辦解送之文武大小官員俱著交部查

明分別議敘其承送兵丁著交和起等查明詳報  
軍機大臣應如何恩賞之處具奏請旨

恩免陝甘兩省綠營官兵借支銀兩

上諭軍機大臣曰陝甘兩省辦理軍需以來綠旗各  
營辦解馬匹及一切公私借墊為數頗多例應於  
官兵糧餉內均攤扣還朕念伊等趨事急公倍多  
勞苦更加扣餉生計不免拮据今軍務將竣兵艱  
宜卹著加恩免其按名扣抵但此等借項均關國

帑不便虛懸著於陝甘各營兵數內酌留公費名糧通融彌補以清帑項該督黃廷桂詳細查明妥協籌酌應留名數核實奏聞一面辦理副朕優卹戎行至意

命封公納噶查為貝子

上諭軍機大臣曰納噶查此次奉派差往阿克蘇城行走奮勉著加恩晉封貝子今已無庸前往即令回至伊游牧地方休息以示優卹

甲子

命定邊右副將軍薩喇爾駐劄特納格爾辦事

上諭軍機大臣曰前經降旨令薩喇爾解送阿睦爾  
撒納來京此時若逆賊就擒之信未確薩喇爾既  
不必前來亦毋庸同策楞等進發策楞等統領大  
兵前進其一切應援事宜亦屬緊要薩喇爾即駐  
劄特納格爾協同達爾黨阿辦事

命定西將軍策楞確查阿睦爾撒納情形

策楞奏言二月初三日自伊犁前來之莫和里  
告稱阿睦爾撒納帶兵三百名逃向伊犁北山  
正月十七日回人和卓木帶兵數千名在察卜  
齊里嶺地方擊敗阿睦爾撒納復逃至固勒扎  
之北山摩輝圖居住十九日令我寄信至巴爾  
達穆特鄂拓克推素隆噶勒雜特等處等語臣  
等伏查從前侍衛福招等報稱台吉諾爾布等  
於正月二十一日在雅瑪圖嶺擒獲阿逆詢之

莫和里據稱並未聞諾爾布等擒拏之信似福  
昭等所報事屬子虛但賊被回人擊敗勢甚窮  
蹙現今台吉南泰同侍衛福昭帶兵擒拏玉保  
尼瑪等相繼進發臣等大隊兵丁亦剋期齊集  
逆賊自可計日就獲奏入

上諭軍機大臣曰策楞等奏稱據伊犁脫出之莫和  
里告稱阿睦爾撒納於十七日被和卓木回兵擊  
敗十九日令伊前來等語先據福昭報稱於二十



一日拏獲阿睦爾撒納莫和里於十九日前來是  
福昭得信在莫和里之後但福昭自二十一日以  
後未經續報此時曾否拏獲著策楞詳查確實即  
行奏聞

丁卯

叅贊大臣達爾黨阿疏奏領兵前赴安集哈雅  
達爾黨阿奏言臣帶領官兵由朱爾都斯進發  
前聞阿逆已經拏獲准將軍策楞咨文停止進

兵即在特訥格爾駐劄辦事二月十二日復接  
策楞咨令臣派兵一千名至安集哈雅等處接  
應臣現在駐劄兵丁除富德帶往辦理唐古忒  
五百名外酌量揀選一千一百行文巴里坤大  
臣兆惠等作速解送馬匹應用臣即於二月十  
七日帶兵先行起程前赴安集哈雅奏入

上諭軍機大臣曰前命薩喇爾駐劄特訥格爾會同  
達爾黨阿辦事今達爾黨阿已領兵前赴安集哈

雅特訥格爾一應事務亦屬緊要即著薩喇爾率同三格辦理所有定邊右副將軍印雖經扎拉豐阿帶往薩喇爾仍著授為副將軍俟拏獲阿逆即遵前旨令其押解來京

三月己巳朔

訓諭定西將軍策楞等

上諭軍機大臣曰今日覽策楞等陳奏一摺俱係尋常事件其擒獲阿睦爾撒納之處並未聲明伊等

前次奏阿逆業已就擒今又隔十餘日之久此際應得確信即尚未確實亦應將現在大兵已至何地去伊犁相距遠近情形詳悉奏聞何竟無一言奏及深可駭異即如尼瑪現於玉保領兵同進賞伊騎都尉世職俟到伊犁傳旨並未遲悞何必行文即行辦理殊屬不知緩急今策楞既經傳諭即著將賞給尼瑪恩克博羅特吞圖布等世職照伊等奏請之子承襲其達什策凌游牧現被搶掠著

酌量加恩賞銀數百兩遷至和博克薩里地方暫  
行安插仍將現在大兵所至情形速行奏聞  
諭定邊左副將軍哈達哈等辦理烏梁海事宜

上諭軍機大臣曰據德善等奏報烏梁海等喧傳哈  
薩克與阿睦爾撒納兵勢連合共相擾亂等語此  
皆烏梁海等捏飾謠言搖惑衆心情罪可惡伊等  
畏威內附全不可信此等傳言明係聽阿逆指使  
妄行聲張其背叛情形已露若不嚴加懲創不足

以示儆戒著傳諭哈達哈密交和托輝特郡王青  
滾雜卜貝勒策布登扎布於伊等兵丁內酌量選  
派前往密查其為首倡惡之人即行正法現又據  
遣往烏梁海換易馬匹之副都統察達克等報稱  
圖布慎莽噶拉克俱即將馬匹換易尚屬急公此  
二人應加寬宥若郭勒卓輝已屬首鼠兩端之人  
然從前尚有出力之處青滾雜卜等應詳加體察  
斟酌辦理至鄂木布博博等則斷不可恕務應查

拏嚴究其屬人一併擒獲賞給軍前効力人員馬  
匹牲隻盡行收取以資兵力侍衛德善奉差時已  
有畏懼情形及至彼處一聞烏梁海等捏造之言  
不審虛實即行退回甚屬懦怯德善著革去侍衛  
仍同順德訥前往哈薩克曉諭以觀後效青滾雜  
卜等即將何時前往辦理之處速行奏聞  
命授順德訥為頭等侍衛前往哈薩克曉諭  
上諭軍機大臣曰順德訥曾往哈薩克曉諭人尚明

白著授為頭等侍衛賞銀一百兩令其再往哈薩克傳旨曉諭阿布賚現在逆賊阿睦爾撒納窮蹙無聊計日就擒前阿逆曾向哈薩克借兵阿布賚並未給與深知大義實可嘉予再哈薩克屬人等亦有搶掠塔本集賽之事塔本集賽正在附和阿逆之時則伊等初非助逆行事乃正為天朝出力剪其黨羽恐伊等不知妄生疑慮是以遣使前往曉諭阿布賚從前遣使朝貢具見誠悃如能傾心



內附自當格外加恩俾伊等安居樂業永享太平  
伊等惟善自約束毋使屬人越境滋擾其準噶爾  
各部已嚴行禁止亦不得擾害各部落將此明白  
曉諭如阿布賚遣使入覲即令順德訥帶領前來  
賜哈薩克阿布賚敕書

上諭哈薩克阿布賚曰準噶爾數年來內亂頻仍各  
部驚擾厄魯特等流離困頓並失生計朕為天下  
共主不忍坐視爰申天討平定伊犁令伊等共享

昇平之福一切善後事宜正待將次經理以為久遠計不料逆賊阿睦爾撒納負恩背叛肆行猖獗今特命將軍大臣等統領大兵兼程追捕而準噶爾衆台吉宰桑等復糾集義旅協力擒拏現在阿睦爾撒納勢力窮蹙棄衆遠颺勢必竄入爾哈薩克境內此賊罪不容誅無論逋逃何處務期俘獲正法萬無漏網之理爾阿布賚恭順天朝從前遣使請安具見誠悃亦因逆賊中途阻止未經入覲至

逆賊性情詭詐爾等素所稔知斷無容留逆賊之  
理設容留在彼亦於爾部有損無益爾部與準噶  
爾接壤從前噶爾丹策零時爾等尚受其節制邇  
來遭準夷哀亂始得逞志現在西域諸部落俱入  
我版圖爾等果將逆賊隱匿容留準噶爾部衆無  
一人與阿逆同心勢必羣起滋事是爾因一人而  
受衆人之敵也況大兵業已壓境彼時陳師索取  
爾部豈能晏然安處事後追悔即已無及爾其熟

計利害一切俱遵朕諭旨速行擒獻永受朕恩欽  
哉母忽

駐劄烏里雅蘇台辦事大臣阿蘭泰等疏奏擒  
拏訥默庫解送京師

阿蘭泰等奏言臣等帶兵往擒訥默庫先令喀  
爾喀公達什丕勒計誘訥默庫并察罕鼐濟巴  
圖濟爾噶爾等前來二月十八日察罕鼐濟巴  
圖濟爾噶爾等解送戕殺侍衛賊人前來次日

訥默庫亦至前後俱已拏獲派察哈爾兵二百  
名交侍衛端濟布德爾森保等於二十日自布  
爾哈雅起程解赴京師臣等即帶領策凌策凌  
烏巴什等至訥默庫游牧將伊妻子宰桑等全  
行拏獲陸續派人解送其牲畜物件應行解京  
分賞之處俱遵

旨辦理其戕殺侍衛賊人業已審明即行正法奏入  
上諭軍機大臣曰據阿蘭泰等奏報訥默庫等已經

擒獲現在解京等語此事係舒明籌辦甚屬妥協  
阿蘭泰一味推諉若照伊所奏辦理必至遲悞若  
將阿蘭泰男爵革去即賞給舒明以示鼓勵阿蘭  
泰仍著交部嚴察議奏達什丕勒能計誘訥默庫  
前來亦屬奮勉著加恩封為貝子解送訥默庫妻  
子等來京時著將阿睦爾撒納之二女從前交與  
訥默庫者一併查出解送來京其剛多爾濟巴圖  
博羅特布顏特古斯等俱不必再行查辦訥默庫

所有屬人俱著分賞策凌策凌烏巴什等嚴加約束

命叅贊大臣雅爾哈善來京面聆訓示再赴軍營

庚午

訓飭叅贊大臣玉保

上諭軍機大臣曰據玉保等奏稱拏獲阿巴噶斯屬人烏遜供稱阿逆現領厄魯特兵八千名哈薩克兵八千名已將烏遜送往將軍營內又聞阿逆現

在出痘甚重等語烏遜乃賊人黨羽所言不過虛張聲勢既已拏獲即行正法一面密告策楞何用送往軍營搖惑衆聽王保辦理甚屬不合且此次奏事應候探明福昭所報確信再行陳奏即福昭等所報不實或被普爾普所欺亦宜一併查明奏聞乃並無一語奏及與策楞昨日所奏正同伊等既冒昧於前又復遲疑不進是誠何心即如另摺所奏宰桑巴桑等告稱初七日阿巴噶斯烏勒木



濟二人至噶順地方見大兵已到即由山路奔竄  
約計初八日即到阿睦爾撒納處等語由此觀之  
阿睦爾撒納所往地方與我軍營相距甚近而巴  
桑即係親見阿巴噶斯逃竄後來至軍營者若如  
其言即行追逐早已可抵賊營何伊等行走甚速  
而王保等行走甚遲至於如此懸殊謂非退縮不  
前而何現在賊黨巴蘇泰又復來歸則其窮蹙情  
形已不能支王保等應即迅速往擒倘在遲緩悞

事斷不寬貸如阿逆果出痘身亡亦必將伊屍寸磔以彰國憲毋許草率完結

壬申

命都統巴祿等會同將軍策楞進剿

上諭軍機大臣曰從前巴祿領兵往迎薩喇爾於吐魯番今薩喇爾已經前來巴祿想已領兵徑赴軍營或尚留於吐魯番著即速赴策楞處會同進剿巴祿由朱爾都斯一路前往中途有投順之人即

行受降其有應用兵力收服者亦即酌量辦理再  
據達爾黨阿奏稱接准策楞咨文即帶特訥格爾  
兵丁一千名趕赴軍營等語現在逆賊就擒未得  
確信此際即接有不必調兵之文亦不得停止仍  
將大兵分隊陸續前往聯絡聲勢以壯軍威

定議厄魯特等搶奪馬匹治罪條例

侍郎舒明奏言厄魯特等奪取臺站馬匹及運  
糧商民駝隻財物各犯俱經審明所有首犯得

勒格爾等應疑斬立決妻子給與鄰盟查出家  
產給與被奪之人其為從各犯應擬絞監候俟  
秋審減等發落等語得

旨軍機大臣議奏尋議查舒明所擬盜竊臺站馬匹  
賊犯俱係照例辦理但此等新降之人於遷移  
游牧時中途擅行搶奪甚無法紀若僅照例辦  
理不足示懲此案賊犯應請不分首從俱擬斬  
立決以示儆戒餘俱照舒明所奏辦理再厄魯

特等遷至額克阿喇勒地方令伊等耕種自給  
出自

殊恩該扎薩克剛多爾濟巴圖博羅特等理應嚴行  
約束不使生事今伊等目無法紀盜竊累累該  
扎薩克剛多爾濟等俱應交部嚴加議處奏入  
得

旨該扎薩克等俱應交部議處但念伊等係新降之  
人未知內地禁例著從寬免其交部餘依議

癸酉

命授沙喇薩琿等為宰桑

上諭軍機大臣曰前經策楞等奏請將庫圖齊授為  
阿巴噶斯鄂拓克宰桑已降旨准行今沙喇薩琿  
又在軍營投誠著將庫圖齊調為哈丹鄂拓克宰  
桑其阿巴噶斯鄂拓克宰桑著沙喇薩琿補授

乙亥

諭定西將軍策楞等擒拏逆賊事宜

上諭軍機大臣曰覽策楞等兩次所奏分兵前往洪郭爾鄂博擒捕阿睦爾撒納之處尚屬近理但觀伊等情形並未迅速前往則於軍行緩急機宜茫然不曉據陸續脫出之人俱稱阿睦爾撒納被回人和卓木擊敗勢蹙力窮在洪郭爾鄂博居住正與現在策楞等領兵前進地方相距不遠何必又分哨探大隊之兵以次前進乎即當選集勁旅合力速行及賊人未得逃竄之先即行追及始與事

機相協即使逃出之人所言未必盡實或大兵馬力平常亦應急速趨赴審量賊情如賊人之力尚強則我兵暫為緩行俟後隊既集協同進發亦無不可今乃未見一人即已如此遲滯雖逆賊勢已窮蹙豈肯坐待兵至而束手就縛乎又豈必俟目覩策楞等到後始知倉皇奔竄乎此即策楞等不知事理之明驗由伊等延緩情形度之則此賊未必即能擒獲試思逆賊一日不獲則此事一日可



了乎策楞等一何悖謬至此此時逆賊若仍未獲則此旨到日逆賊必早經免脫或先定一竄跡之地矣如果逃往哈薩克布魯特等處斷不可虛張追逐之勢遽行撤兵即著派達爾黨阿玉保尼瑪於索倫兵內選派一二千名奮力追趕仍先遣人往哈薩克傳諭阿睦爾撒納乃重負厚恩之逆賊今逃入汝界汝等將以擒獻大皇帝必重加恩賞伊或詭言逆賊到伊界內又逃往布魯特即當諭

以逆賊所到之處大兵即當窮追期於必獲而後已並不騷擾汝等汝等少有阻撓即是甘與賊通必將一體辦理使之知所震懾出力追捕決不可稍為姑息朕觀外夷情形均多恇怯即如阿睦爾撒納如此窮蹙而伊等尚不免畏懼況我統索倫精兵前往丕振軍威伊等無有不驚服之理逆賊萬一逃往即遵旨帶領索倫兵往追務獲此皆朕先事籌畫者若俟奏到逆賊脫逃時始行降旨指

示必致貽悞矣總之道途遼遠一切當審緩急之  
宜而出以果斷始能適合機宜庶叛賊可以就擒  
策楞等其殫心熟籌勇往辦理

命定邊右副將軍薩喇爾來京

上諭軍機大臣曰前經降旨令薩喇爾俟拏獲阿逆  
後來京今伊已回至巴里坤朕念伊自前歲領兵  
馳驅殊屬勞瘁況伊犁一切情形尚有應行面詢  
之處薩喇爾著即由巴里坤起程來京

平定準噶爾方略正編卷二十五